

concurrant plebei omnes philosophi (sic enim ii, qui a Platone, et Socrate, et ab ea familia dissident, appellandi videntur) non modo nihil unquam tam eleganter explicabunt, sed ne hoc quidem ipsum, quam subtiliter conclusum sit, intelligent. Sentit igitur animus se moveri: quod quum sentit, illud una sentit, se vi sua, non aliena moveri: nec accidere posse, ut ipse unquam à se deseratur. Ex quo efficitur aeternitas.

Tusc. I. Cap. XII. A. Expone, nisi molestum est, primum animos, si potes, remanere post mortem. — M. Auctoribus quidem ad istam sententiam, quam vis obtineri, uti optimis possumus; quod in omnibus causis et debet et solet valere plurimum: et primum quidem omni antiquitate; quae quo propius aberat ab ortu et divina progenie, hoc melius ea fortasse, quae erant vera, cernebat. Itaque unum illud erat insitum priscis illis, quos Cascos appellat Ennius, esse in morte sensum, neque excessu vitae sic deleri hominem, ut funditus interiret: idque tum multis aliis rebus, tum e pontificio jure, et caeremoniis sepulcrorum intelligi licet; quas maximis ingeniis praediti nec tanta cura coluissent, nec violatas tam inexpiabili religione sanxissent, nisi haereret in eorum mentibus, mortem non interitum esse omnia tollentem atque delentem, sed quandam quasi migrationem, commutationemque vitae, quae in claris viris et feminis dux in coelum soleret esse; quum ceteri humi retinerentur, et permanerent tamen. Ex hoc et nostrorum opinione, *Romulus in coelo cum diis agit aevum*, ut famae assentiens dixit Ennius: et apud Graecos, indeque perlapsus ad nos et usque ad Oceanum Hercules, tantus et jam praesens habetur deus: hinc Liber, Semele natus, eademque famae celebritate Tyn- daridae fratres: qui non modo adjutores in praeliis victoriae populi Romani, sed etiam nuntii fuisse perhibentur. Quid? Ino Cadmi filia, nonne Leucothea nominata a Graecis, Matuta